

UCAPAN OLIH YAB KETUA MENTERI PULAU PINANG
DR. LIM CHONG EU DI UPACARA PEMBUKAAN
ANIKARAMA HARI KEBANGSAAN, RUMAH PANGSA
PADANG TEMBAK PADA HARI SABTU, 1HB OKTOBER
1977 DI BLOK A, RUMAH PANGSA PADANG TEMBAK
JAM 7.00 MALAM

Pengerusi dan Ahli-Ahli Jawatankuasa Penganjur,

Yang Di Pertua dan Ahli-Ahli Persatuan Penghuni-
Penghuni Rumah Pangsa Padang Tembak,

Penghuni-Penghuni Rumah Pangsa Padang Tembak,

Dzif-dzif yang dihormati,

Tuan-tuan dan Puan-puan sekalian.

Saya mengucapkan terima kasih kepada

Pengerusi dan Ahli-Ahli Jawatankuasa Pengelola dan

Yang Di Pertua Persatuan Penghuni-Penghuni Rumah

Pangsa Padang Tembak kerana sudi menjemput saya

untuk meresmikan pembukaan Anikarama Hari Kebangsaan

pada malam ini.

2. Saya menyampaikan setinggi-tinggi tahniah kepada Jawatankuasa Pengelola dan Yang Di Pertua atas kesungguhan minat dan ketekunan mereka dalam menganjurkan majlis ini yang mana kutipan-kutipannya akan disalurkan kepada Tabung Biasiswa Persatuan tuan-tuan. Usaha ini amat terpuji dan baik dan saya harap orang ramai akan tampil ke hadapan untuk memberi derma dan sokongan dengan murah hati terhadap Anikarama Hari Kebangsaan.

3. Usaha tuan-tuan menunjukkan perhatian berat yang diberi oleh ahli-ahli Persatuan tuan terhadap kebajikan dan kesejahteraan penghuni-penghuni rumah pangsa Padang Tembak. Ini benar-benar mencerminkan semangat 'berdikari' dan prinsip-prinsip Rukunegara. Sebenarnya di samping tujuan mengutip derma bagi keperluan pendidikan anak-anak penghuni-penghuni

di sini, Persatuan tuan juga dapat memupuk semangat persefahaman, muhibbah dan keharmonian di kalangan penghuni-penghuni yang menjadi teras pembangunan sebuah negara Malaysia yang bersatu padu, aman dan lebih bahagia.

4. Kini Malaysia sudah mencapai 20 tahun kemerdekaan dan Negara kita akan terus 'Bersatu Maju Jaya' di bawah pimpinan Yang Amat Berhormat Perdana Menteri kita, Datuk Hussein Onn. Negara kita sedang melalui satu peringkat yang penting dalam pembangunan negara di bawah Rancangan Malaysia Ketiga. Justru itu, dapatlah negara kita mencapai perkembangan yang lebih pesat lagi di dalam kemajuan sosio-ekonomi selaras dengan objektif-objektif

penyusunan semula masyarakat kita supaya masyarakat kita menjadi satu masyarakat Malaysia yang benar-benar bersatu padu dan yang adil dan saksama bagi semua orang. Lebih-lebih lagi, usaha tuan-tuan untuk mengekalkan keamanan, keselamatan dan kebahagiaan di dalam Negeri kita dan Negara kita pada keseluruhannya akan menjamin supaya jenerasi Malaysia baru dapat hidup, kerja, main dan berkorban bersama-sama sebagai saudara-saudari Malaysia yang mempunyai matlamat yang sama.

5. Saya ingin mengambil peluang ini untuk mengucapkan terima kasih kepada penghuni-penghuni Rumah Pangsa Padang Tembak atas sambutan baik dan penyertaan aktif serta sokongan tuan-tuan terhadap rancangan-rancangan Kerajaan seperti Rukun Tetangga, Jawatankuasa Kemajuan dan Keselamatan Kampung,

Pemadam, Relu, Perhubungan Masyarakat dan sebagainya. Saya percaya tuan-tuan akan terus mengekalkan usaha menjaga keselamatan kawasan tuan dan mencegah hasrat-hasrat buruk anti-nasional dan anasir-anasir sabversif yang senantiasa cuba menjejaskan masyarakat kita.

6. Sekali lagi saya mengucapkan terima kasih kepada Pengerusi dan Ahli-Ahli Jawatankuasa Pengelola dan Yang Di Pertua Persatuan Penghuni-Penghuni Rumah Pangsa Padang Tembak atas jemputan tuan-tuan dan saya menyampaikan ucap selamat di atas segala kejayaan dalam majlis ini dan semoga saudara-saudari menikmati suasana yang gembira dan menarik pada malam ini.

7. Sekarang dengan gembiranya saya mengisytiharkan Anikarama Hari Kebangsaan dibuka dengan resminya.

Sekian, terima kasih.